

## 36 menaschis presentan 30 professiuns

Tgi che banduna oz la scola populara ha biaras pusseivladads da scola ni emprendissadi. La schelta ei fetg gronda e tgi che vul anfla la via giavischada. Tut auter ei quei per fatschentas che tschercan emprendistas ed emprendists. Dapi onns han ellas miserias d'anflar giuvenils che vulan sescolar, surtut per professiuns da mistergner.

Hans Huonder/FMR

L'Uniun da commerci e professiun Mustér (UCP) representa buca mo ils interess dils patruns ella publicitat e la politica. Ella s'engascha era sin auters secturs sco per exempl l'embellaziun dil vitg ni – sco il cass actual – ell'informaziun da giuvnas e giuvens tgei pusseivladads d'emprendissadi ch'els han. Persuenter ha ella installau ina grupper da lavur. Quella ha survegniu l'incarica d'examinar las pusseivladads d'orientar las scolaras ed ils scolars dalla regiun davart la schelta d'emprendissadis ch'il territori dall'uniun cumpeglia. L'Uniun da commerci e professiun Mustér ha commembras e commembers da Tujetsch e Medel entochen giudem la Cadi.

### Treis seras d'informaziun

L'autra jamna obtegnan las scolaras ed ils scolars dalla sisavl classa primara entochen il scalem superieur in flyer dall'uniun. Quel cuntegn las indicaziuns davart las treis seras d'informaziun dalla presentaziun dallas professiuns. Quellas han liug ils 24 d'uost 2021 el Center d'agricultura a Mustér, ils 26 d'uost 2021 ella zona d'industria Pignola sut Segnas ed ils 31 d'uost 2021 ella Casa da tgira s. Martin a Trun. Las informaziuns cuozan mintgamai dallas 19.00 entochen las 21.00. «In e scadin ei envidaus a quellas, era ils geniturs», di il cau dalla grupper da lavur, *Adrian Bigliel*. 36 interpresas – tuttas commembras dall'UCP – ein dalla partida e presentan en tut 30 differentas professiuns: Digi informaticher, il pur, il polimecanist entochen la tgirunza da personas attempadas, il cuschinier ed il scrinari. «Cun quella revista lein nus mussar con gronda che la schelta da professiuns ei cheu tier nus», di Adrian Bigliel. Cullas pusseivladads da scolaziun e perfecziun che seporschan parallelmein tiegl emprendissadi ni suenter quel ses'arvan interessantas perspectivas als giuvenils. Allas treis seras d'informaziun dattan las interpresas plaid e fatg davart ils emprendissadis: «Igl ei ina buna caschun pils giuvenils e lur geniturs da vegnir en contact culs purschiders d'emprendissadis e secapescha era per las fatschentas da mussar tgei ch'ellas san porscher.»

### Buna glieud pigl avegnir

«Menaschis che vulan subsister e haver success a liunga vesta drovan buna glieud. Mo aschia eis ei pusseivel da mantener la purschida cheu tier nus e seguir plazzas da lavur», puntuescha Adrian Bigliel. El ei cuntents cul diember da menaschis che separticipescha allas informaziuns, schegie ch'in ni l'auter dapli havessi era buca dau donn: «Quellas informaziuns ein secapescha era ina fetg buna caschun per las fatschentas da vegnir en contact cun giuvenils e geniturs.» Adrian Bigliel constatescha ch'igl ei grev d'animer glieud qualificada

dalla Bassa da vegnir a luvrar sisum la Surselva. Per quei motiv seigi ei fetg impurtont da scolar sezs giuvenils e da mussar a quels che las pusseivladads da luvrar seigien era cheu attractivas: «In ni l'auter banduna forsa nus suenter igl emprendissadi, mo sch'el ha fatg bunas experientschas retuorna el eventualmein puspei in di.» Sin fundament dalla reducziun da naschientschas ils davos onns ei era il diember da giuvenils che banduna la scola populara sereducius marcantamein: «Buca tuts menaschis ein vegni d'occupar lur plazzas d'emprendissadi ils davos onns. Grev eis ei surtut d'anflar giuvnas e giuvens per professiuns da mistergner.» El e ses collegas dalla grupper da lavur – *Patric Giger, Pierino Bisquolm, Fabian Tschuor, Annette Decurtins* ed *Edgar Durschei* sco representant dalla suprastonza dall'uniun – speran sin bia frequenzas las seras d'informaziun. «Sequent igl interess vegnin nus lu a decider schebein nus organisein quei arranschament gia puspei en in onn ni en dus onns», di Adrian Bigliel. Ina proxima ga duei la revista haver liug en auters loghens. In'annunzia per las informaziuns vegnentas ei buca necessaria. Dil reminent: Sin la pagina berufsberatung.ch san ins era tschercar plazzas d'emprendissadi libras.